

EEFEESUSA

Efeesusu maqusanaasa

Pauroofa akara rumannimaqoo

ufafa.

¹ Qinee Pauroosa Anutuna iriranannai asauku mundirana Yisunaindi maridaqa, mifa diqiqoo fasiqausa maridaqa. Anutuna maqasaa fasiqa anaasee Efeesusu maqusai mariasa asauku mundirana Yisuna ufamau andeeqasee maqee maqee fimariasa inni maa akarana rumanni-maqaidaqa.

² Maasa qikoofa Anutufa faqa maasa karaambaiqa asauku mundirafa Yisufa faqa narí afaarirana faqa narí asooarana faqa inni nimiani.

Pauroofa asauku mundiranaki mariasa innaarunai amiqi amiqirana mararufa.

³ Maasa dufi dufi qirana maasa qikoona Anutuna faqa maasa karaambaiqa Yisuna faqa nimiaqa. Maasa asauku mundiranaki keeqafufanoo mina akoofa Anutufa amiqi amiqirana maasa Yisuna namufaqa qiminau. Mifa innaarunaindaraa amiqira dadaaqirana qimaqaifanoo miqoo innaarunai maridanoo, minara maasa dufi dufi qimamaqaidaqa. ⁴ Ooqai maa maqa maqana sia auqu kamuqoo faiqí faqa sia maru kamuqoo Anutufa moomoosa kambiaqa marifandinausa kinaana maasa rusandeesamumandee marararee qimaqoosa maraqaisa maridaqa. Narí asauku mundirana

Yisunannai maasa maraḳoosa sia aaḳarausa mariaḳeera noori kandamasee andeeḳarausa mariaḳee qimasee maasa rusandeesamumasee maraḳoosa maridaḳa. ⁵ Sia faiḳi maru kamuḳoo Anutufa narí aidiranannai maasara maaḳimminau, geeḳa qisauku mundiranannai misa qini faiḳi namu qiraamuḳmaakai kammambifaḳa geeḳa unnannai misa mara ḳuḳaanauree qinau. Anutuna aidirafa fuaninnana miḳiminoo maridanoo. ⁶ Anutufa narí kaaḳa ḳara areenara afaarirana narí amuḳsira amaaku kaḳi nimimari ainainnara foora kaḳi nimirau. Minara maasa qimuḳusa ookiḳari idaaḳira ainaina uḳannee qiaḳeera kaḳi nimirau.

⁷ Anutufa narí asauku mundirana kuḳiranannai maasa mandainainakinaana idukuḳiseenoo maasa mandoosana akiaḳara minniḳisainaḳa marianauro. Maasa minara irisee Anutuna firaa afaariranara akooḳoo uḳanna marifaḳa ḳafamasee irisee naḳimasee maraanauree minara rufiaida furufaridaḳa. ⁸⁻⁹ Anutufa narí irirana firaa faḳa ḳafeemariana faḳa maraseenoo minannai ooḳai marararee qimaḳoona maraseenoo narí kukeeḳara irirana asauku mundiranannai aiḳama qimaḳoo ainaina anoonaikianifeera qimasee mina maa kamuḳoo kooroomasee narí faiḳi namu araamuḳmmaakai kiranara maasa qimaḳiminau. ¹⁰ Anutufa narí kai irinoo andeeḳara aukuanee qimasee narí ooḳai kambiaḳaaninna ainainara qimarufa taikaannoo minara qimarufa maaḳimmiannoo Anutufa

aiqama ainainna auquqoo ainainafa innaarunai mari ainaina faqa maaqoo mari ainaina faqa oonu maree ani mareeqeenoo moodaanaki quqaseenoo asaku mundirafa misa nikiagasaa mariannoo.

¹¹ Anutufa mi aiqama ainainna narí ooqai fuanee qimaqoomau fidanoo miqidanoo. Anutufa narí ooqai fuanee qimaqoomau fidanoo maasa narí aiku asaku mariaqee qimasee faiqí aanaaseeki rusandeesamumandee maasa maranau. Sia kaqi miqinau, asaku mundiranannai kai mina aiku asaku mariafanausa maridaqa. Ooqai indaaru oosana aroo aukuanna mi irirana maraqoomau fidanoo asaku mundiranannai maasa maraidanoo. ¹² Maasa asaku mundirana irirana naaree indaaru irisee minara afeesimariasa maasa Anutuna kaqa areenaranara dufi dufi qidaqa.

¹³ Innee Efeesusa maqannaasa faqa miqikai iqa mariafanoo. Amiqira fasaasa ufa innaaruna asumu marirana nimi maria ufana innee iriseeqa kuqaa anoonufee qufanoo Anutufa narí naaquqara maraquna nimiani qimasoofoa inni niminoo minannai nariara utaaqanau.

¹⁴ Anutuna maraquna nimirafa Anutufa innaarunai qimianinna ainainnara qima afeekaikamma utaaqamaqoofa maridanoo, mifa Anutufa kuqaa mandainaina akiaqara rumberanakinaana idukirana qimiannoo fee qimarifa maridanoo, maasa minara irisee Anutuna kuqaa areenaranara dufi dufi qidaqa.

Pauroofa Efeesusa maqannaasara innaaru qidanoo.

15-16 Qinee Pauroosa minara iriseeqa innee Efeesusa maqannaasa Karaambaiqa Yisuna saqarikiranara irisee faiqí aanaaseera Anutuna ufa irimariasara ridaqa dadaaqidaqa minara iriseeqa iriafannaqooqari qinee Pauroosa inniara Anutufinnai dufi dufi qidaqa. Qinee maqee maqee inniara innaaru qidaqa, maasa karaambaiqa asauku mundirana Yisuna kaqa areenarana akoofa ¹⁷ Anutufa narí maraquna inni nimiranoo mifa irirana faqa Anutuna oosana faqa kooroomannimaqainaqa innee minara iriaqeera innaaru qidaqa.

¹⁸ Anutufa inni naaramasee narí areenarana afeesiaqee qimarianara innee iriaqee qimasee inniara innaaru qimasaanaga inni nifu nitikura quandasainaqa areenarana nimianinnana afeesiaqeera innaaru qidaqa. Naaquqara amiqi amiqirafa idaaqirafa moomoo uqanna narí maqasaa fasiqa anaasee innaarunai nimirara qima afeekaikidanoo nimiannoo minauqara faqa inniara iriaqeera innaaru qidaqa. ¹⁹⁻²⁰ Maasaki mina ufasaa irirana rusimariaqooqari Anutuna afeeka fannoo maasaki ainaini marinara faqa innee iriaqeera qinee Pauroosa inniara innaaru qidaqa. Anutufa asauku mundirana kuqiranaki-naana uqeerasee innaarunai narí aqa narí asauku uqannai oqumaruqoo firaa afeeka faqa maasaki ainainimarifa faqa amana amana kai moodaa firaa afeeka maridanoo.

²¹ Miqoo innaarunai asauku mundirafa aiqama ainainasaa uriqaramafi rakisidanoo, aiqama innaarunai uriqararausa faqa faiqí firasa faqa afeekafaqaasa faqa karaambaiqauqa faqa

misauqa faqa urinaaqaramafi rakisidanoo. Mifa aiqama afeeka nuqu faqaasa maa maqa maaqanaki mariasa faqa innaarunai mariasa faqa urinaaqaramafi rakisidanoo. ²² Anutufa aiqama ainaina mareeqeenoo asauku mundirana aramandunnai quqaseenoo mina mareeqeenoo Yisuna ufara suqimariasa niki-aqasaa quqasaifanoo aiqama ainaina uriqarara karaambaiga maridanoo. ²³ Yisuna ufara suqimariasa Yisuna adakara foora maridaqa, aiqamai mariainainafa qumbiqeemarifa nari adakaki Yisuna ufara suqimariasaki firaqoo maridanoo.

2

Ooqai kuqiranaki ubeekoofaqa maqee asumu mariranaki ubeekaqa maridaqa.

¹⁻² Qinee Pauroosa sia Yuda maqannaara qidaqa innee aanaamuru mariasara qidaqa, ooqai inniqa ufa rukiarana faqa aaqarana faqa miqinunna akiaqara kuqiranaki mariusa mariqau, mi aukuanna maa maqa maaqana mandoosana-mau kai fimariqau. Anutuna ufa rukiee mariasa maqee rakisi mari afaannafa Anutuna innaaruna meerai marifanoo mina ameemaanai marina, mina ufara eedoo kai qimarusa mariqau. ³ Maasa faqa aiqamausa aanaamuru Anutuna ufa rukiee mariasa naanna ramasee maasa qeeqa faiqi faiqi mandiriranamau fidaqa qeeqa qifaaqa irirana afaariqa kaqi qeeqa manda didiramau

kai fiqiafana. Maasa Yuda maqannaasa aanaa-
muru naanna ramasee qeeqa qifaaqa afaara-
masee mina akiaqara Anutuna aranaqaranaki
firaridaqa.

⁴⁻⁵ Anutufa mina qafamaseenoo maasara
amuqusirana faqa nifauarafa faqa firaatia
marifanoo asaku mundirana saimbaqa maasa
faqa kuqiranakinaana uqeera qiseenoo sia moo
ainaina, Anutuna afaarirafa kai innaaruna
asumu mariranaki quqanniseenoo. ⁶ Anutufa
maasa asaku mundirana Yisunasaa atooarana
qafamaseenoo mina namufaqa kuqiranakinaana
uqeeraqiseenoo Yisuna namufaqa Anutuna
innaaruna mariasasaa rakisi nimaqaaqee qifaqa
miqoo rakisirausaikiqa mariana. ⁷ Sia
Anutufa fifau miqinau, nari fira afaarirana faqa,
maasa asaku mundirana Yisunaki keeqarana
qafamaseenoo nari fira aidirana amuqusirana
faqa naaru kambiqainausa uqannifiqarara
miqinau. ⁸ Sia moo ainainannai Anutufa nari
afaariranannai kai inni innaarunai asumu
mariranaki quqannisaidanoo, innee Yisuna
saqarikiranannai afaaramma nimaqaidanoo.
Inni asumu nimirafa sia innee andeeqasee
fimarianasaafau mundidanoofau, sia innee
amiqira oosana marasaida kadaapiridee
qimarianasaafau mundidanoofau, Anutuna kaqi
nimiranasaa kai innaarunai asumu marirana
maasa qimirana uqeereenoo.

⁹ Sia maasa qeeqa kadaapiriranannai
innaaruna asumu maraanaura minara sia
fifau maasa qeeqa qimooqira ufa mariannoo.

¹⁰ Anutufa maasa auqufa maridanoo sia fifau

maasa auqinau, maasa asauku mundirana Yisunasaa atooqaranasaaqari andeeqasee nirana marirana mariaqee qimasee maasa auqinau. Doo ooqai mi andeeqara nirana marirana maasara deedaqammaqoofa maridanoo.

Yuda maqannaasa faqa aanaamuru faqa asauku mundiranaki moodaanaki maridaqa.

¹¹ Yuda maqannaasa ooqaindari nariara kai Yuda maqannaasa fainanduqirausa Anutunaindi maridee qimasaida inni aanaamuruara sia maasa fainanduqirausa marunnanara aqoosai mariasa maridee qimariqau. Misa fifau nari fainanduqiranara qidaqa miqi qimariqau. Innee aanaamuru mariasa innee ooqai mariunara iriaqa.

¹² Innee Efeesusa maqusanaasa asauku mundiranasaaqari naaduma nianasaa mariusa mariafanoo, innee aanaamuru Anutufa maqasaaqaraasaki sia rusandeesamumandee nariara maroosa mariafanoo, aanaamuru nianasaa mariusa mariafanoo. Anutufa Yuda maqannaasa faqa moodaanakikira ufa oosana oosana qima afeekaikiranasaa mudiqa mariusa mariafaqa innee aanaamuru sia minaki marusa naaduma nianasaa marusa mariafanoo. Innee Efeesusa maqusanaasa maa maqa maqanaki maridaqa sia Anutunara faqa moo ainainara faqa irimariqau kaqi furufara kaimmiqaniqau, Anutuna siaisa mariqau.

¹³ Doo magee innee asauku mundirana Yisunasaa atooqaana akiaqara inni ooqaindari nianai mariusa magee Anutufa inni rarisameeqeenoo adeedi quqeenoo, asauku mundirafa aunirira saqarisaa kuqunannai kai

miqinoo. ¹⁴ Anaamuru faqa Yuda maqannaasa faqa namuqaara foora niana niana rakee iqa mariaasa asauku mundirafa narí kai mareeqee moodaanaki quqaseenoo asoarana maasa qiminau. Yuda maqannaasa faqa aanaamuru faqa namuqaakiqa marufanoo qambaana faandamura ititanoo maruna asauku mundirafa narí afaaqannai faandaamura rakee mandoofaqa moodaanaki kiqau. ¹⁵ Mooseena sandufakina oosanoosana ainainara nimaarusirana mifa faandaamurara foora Yuda maqannaasa faqa aanaamuru faqa aiqamaqara rakeemaqoofaqa mariqau. Asauku mundirafa doo mina ruka taikasoofaqa mi atiqanda oonu maree ani maree asauku mundirana faqa moodaanaki kiqa asoaranaki maridaqa.

¹⁶ Asauku mundirafa narí aunirira saqarisaa kuqunannai Yuda maqannaa faqa aanaamuru faqa nariara nariara fidiqaa imaruna aru taikanau, narí aunirira saqarisaa kuqunannai Yuda maqannaa faqa aanaamuru faqa rakimaruna taikaseenoo Yisufa mareeqeenoo mafi moodaanaki quqaseenoo mareeqeenoo Anutuna aanooqirana taikaseenoo narí akoona Anutunaki asoaranaki quqanau. ¹⁷ Miqi marunara asauku mundirafa narí amiqira asoara fasaasa ufa maree qumureenoo innee Anutunasaqari nianai maria anaamurusa faqa Yuda maqannaa Anutuna aaqa mariasa faqa qimanniminau. ¹⁸ Maasa aiqamaqara Yuda maqannaa faqa aanaamuru faqa asauku mundiranannai kai amana maasa moodaa maraqunaki anireeqa maasa qikoona Anutuna

afusaa kikiqianaaura.

¹⁹ Ooqai innee moo maqannaara foora aanaamuruara foora mariasa mariafanoo doo maqee sia miqqa mariafanoo innee doo maqee Anutuna aiku asauku mariasa Yuda maqannaasaki moodaa maqannaa kammambi innee mariafanoo. ²⁰ Doo maqee sia Yuda maqannaa kai, innee faqa maaqara foora usakafifanoo asauku mundirafa Yisufa nari uqanna faakana miqirafa marinanoo Yisufa niqiqoo fasiqausa faqa Anutuna tamummaqara fasiqauqa faqa maaqa atunara foora marifanoo innee faqa maaqa asaanara foora misasaa faqa Yisunasaa faqa atukaramambiqa mariafanoo. ²¹ Yisufa uqanna faakanara foora maridanoo aiqama maaqa asaana afapita qumarasaifaqa afeekaikiqa mariafanoo karaambaiqa naaquqara amaana maqara foora usakaidanoo fimaree aimaree innooqaidanoo. ²² Innee aanaamuru asauku mundirana saqariki mariasa faqa aiqamausa Yisunaki mariasa faqa Anutufa inni qumareeqeenoo maaqara foora usakaseenoo nari maraqunannai mi maqanaki inniki mari maqafa maridanoo.

3

Pauroofa nari aanaamuruki saikiranara qidanoo.

¹ Qinee Pauroosa minara iriseeqa inni Eefeesusa maqannara Anutufinnai innaaru qidaqa. Qinee inni aanaamuruara qiman-nimunnana akiqara asauku mundirana Yisuna rumbaranara foora Roomma maqannaasa

rumbaranaki marunausa maridaqa inniara innaaru qidaqa. ² Anutufa narí afaariranannai inni aanaamuru dadaaqiaqee qimasee qimunara innee amiqimmandee minara irimariafanoo. ³⁻⁴ Anutufa Yisunara ooqaindari kukeeqanoo marunara maqee aukwana qini kooroomaqimaqeenoo. Qinee maa pasanaki kaqikaqoo minara inni qimannimiqa, innee mina asaana rumaseeqa iriqa qiniara asauku mundirana kukeeqara irirana amiqimmandee iridanoommifoo qifaranoo.

⁵ Ooqai narí kukeeqara irirana Anutufa sia kooroo inau, doo maqee narí maraqunannai amiqira niqiqoo fasiqausa faqa tamummaqara fasiqauqasaa faqa qimanniminoo. ⁶ Mina kukeeqara ufa maaqimminoo maridanoo. Yuda maqannaasa Anutuna amiqi amiqiranaki maridaqa, Yisuna amiqira fasaasa ufa fannoo inni aanaamuru faqa oonu mareeqeenoo Yuda maqannaasa amiqi amiqiranaki quqannisaidanoo. Innee aanaamuru mariasa maqee Yuda maqannaasa saimbaqa moodaa nifaaqara foora maridaqa asauku mundirana Yisunakiqari Yuda maqannaasa qima afeekaikammaqoofa innee aanaamuru misa saimbaqa minaki marida maree mariafanoo.

⁷ Anutufa narí afeekannai naakaparana akoofasaikirana moo qimufaqa qinee minannai Yisuna amiqira fasaasa ufa saikira faiqikiqa maridaqa. ⁸ Qinee Anutuna aiku asauku maqasaa fasiqaki oorudupirausa marunanoo Anutufa sia minara irinoo kaqi mi naakaparana qiminoo diqiqamaqimaqeenoo

asauku mundirana, innaarunai nimira amiqi
amiqira ainaina moomoo ainaina sia amana
asaana rirana amana mi ufanara aanaamuru
qimannimiranaki qini quqaqisaifaqa maridaqa.

⁹ Anutuna ooqai kukeeqara irirafa maqee
kooroommasee faiqi anaasee amiqimmandee
iriaqeera faqa qini minaki faqa quqaqisaifaqa
maridaqa.

Anutufa aiqama ainaina
auquqoofanoo marufa miqooqari moomoo
aukuana nari kukeeqara irirana Yisunara
kisaagasaa rafaqafuqoofanoo marinau.

¹⁰ Maqee aukuana kooroo ianifeera qimasee
Yisuna ufara suqimariasas misannai Anutufa nari
irirana quandaqaandidanoo uqannifiqaiifaqa
qafaidaqa mina amiqi amiqiranara innaarunai
ameemaanai mariasa misa uriqararawsa faqa
rakisirawsa faqa maqee uqannifiqaanifeera
Yisuna kooroo idanoo.

¹¹ Anutufa nari naaru naaru mariranaki
maridanoo mi ainainna auquanauree
qimaqoona maqee auqinau, nari asauku
mundirana Yisunannai mi ainainna, nari
ufara suqimariasakina nari irirana kooroo
ianifeera auqinau.

¹² Maasa Yisunasaa
atooqa marianannai faqa maasa mina
saqarikiranannai faqa sia maasa nisaurida
rufaanaura, paasoosamasee Anutuna afusaa
fuannanara mi eedoo qirafa maasaindi
maridanoo.

¹³ Qinee Pauroosa minara irisee
inni afeekaikamandaida qimannimidaqa. Qinee
Yisuna ufa qimannimunaqa misa minara fifau
qini karabusaki quqeeqa. Inni Efeesusas
maqannaasa qinee karabusaki marunna

aupuraranara iriseeqa sia Yisuna ufa minniseeqa kudoosaapaaqa, innee minara maaqi qiaqa Pauroona karabusaki marirana maasa Efeesusa maqusanaasa amiqimaqimaqaidanoo fee qimasee asasiaqa.

Innee nariara nariara nimuqusiranaki mari-aqeera qidanoo.

¹⁴ Qinee minara iriqa maasa qikoona Anutunara iriseeqa qiqoori saunarafiqa kummara mafi inniara qeeqa qimuqusannoo innaaru qidaqa.

¹⁵ Innaarunai mariasa faqa maqasaa mariasa faqa aiqamatia Anutunasaqaraana nariqa nuqu uqanna maraidaqa.

¹⁶⁻¹⁸ Mi Anutunara inniara innaaru qidaqa, asaku mundirana innee saqarikiranannai mifa anireenoo inni naunduraki maaqakiara foora ani keeqaanifeera. Mifa nari maraqunannai nari areenarana firaanakiqari inni naunduraki afeeka niminaqa mapukusee mariaqa. Qinee inniara maaqi qidaqa innaaru qidaqa, innee inneeqa atukara foora faqa faakanara foora faqa nariara nariara nimuqusiranaki mapukusaaqa, innee Efeesusa maqannaasa faqa Anutuna aiku asaku moo maqanna mariasa saimbaqa afeeka marinaqa minannai asaku mundirana inniara amuqusinoo aidirana firaana iriaqeera innaaru qidaqa. Mifa inniara amuqusinoo aidirana mina kisaagasaa aidirana faqa mina qusa kamu faqa mina meerai sandaaqaira faqa mina meemai farumara foora marirana faqa mina firaatiara iriaqeera qinee innaaru qidaqa. ¹⁹ Eoo innee

mina inniara amuqusirana firaanara iriaqeera innaaru qidaqa, sia amana moo fannoo firaqoo iriannoo, firaafa maridanoo, mina amuqusirana firaafa maridanoo, innee mina amuqusirana firaana iriseeqa Anutuna umbiqarafa innikina umbiqaanifeera inniara innaaru qidaqa.

²⁰ Anutuna afeeka fannoo maasaki saikiranannai naunduraki amiqi amiqirana nimiannoo, mina naunduraki dadaaqirafa maasa sia amana minara iramasee qimianne qianauro sia amana maasa minara irianauro fira aainainatia maridanoo. ²¹ Yisuna ufara suqimariasaa nariqa asauku mundiranasaa atooaranannai Anutuna amooqirafa maqee kamuqoo faqa naaru naaru faqa mariani.

4

Maasa Yisuna adaka atiara foora maridaqa.

¹ Qinee Pauroosa karaambaiqa Yisuna ainaini marunnana akiaqara Roomma maqannaa karabusaki maridaqa. Qinee karabusaki maridaqa inniara afeekaikamandee qimannimidaqa. Anutufa inni naaramasoofaqa innee asauku mundirana saqariki maru kamuqooqari inneeqa nirana mariranara andeeqasee marianifee qimasee inni naarama minaki quqeenoo. Inneeqa marirafa mina amanakai marianifeera qinee qeeqa qimuqusa ookiqari afeekaikamandee qimannimidaqa.

² Sia Anutufa quqaqoo andeeqarana minnisee moomau fuaqa, innee maqee maqee sia urinaaqaraqa oorudupimasee mariaqa, sia aanooiaqa, ireeda kai pisoopisoomandee

mariaqa sia faiqí aanaaseera qusa ufa qimasee aanooiaqa kisaaqasaa ireeda kai idaaqammannimaqaqa. Innee faiqí aanaaseera nimuqusinanoo nidimarinaga mifa kooroo ianiffee qimasee narinni narinni dadaaqifanoo mifa kooroo iani.

³ Anutuna maraquna fannoo inni moodaanaki mara quqasaifaqa mariafanoo innikina asooarafa inni moodaanaki afapita qumaraifaqa mariafanoo innee mina moodaanaki marirana amiqimasee rakisiaqa, rakee iani. ⁴ Maasa Yisuna ufa irimariasa moodaa nifaaqara foora maridaqa, Anutuna maraquna faqa moodaa maridanoo Anutufa moodaa ainainara afeesiranaki inni rarisama quqeenoo. ⁵⁻⁶ Karaambaiaqa moodaa kai maridanoo, Yisuna saqarikirafa moodaa kai maridanoo, amaana nammari moodaa Yisuna auqusaa kai rumannimaqarafa maridanoo maasa aiqama maqa maaqakinaasa nikoofa Anutufa moodaa kai maridanoo, aiqamausa karaambaiaqa mifa kai maridanoo mifa narí ufara suqimariasa aiqama naunduraki maridanoo aiqamausakiaqa ainainidanoo.

⁷ Asauku mundirafa nimira dadaaqira afeeka maasa aiqamausa qiminau narí moomoo dadaaqiranakinaana qiminau. Moo dadaaqira afeeka moo fasiqa aminau, moo dadaaqira afeeka moo fasiqa anaasee niminau. Nimisoofaqa minannai Yisuna saika maraaqeera niminau. ⁸ Ooqeenaa tamummaqara fasiqa asauku mundirafa dadaaqira afeeka qimianinnanara maaqi

qimasee akara rinau.

Mifa rakira karaambaiqara foora maridanoo namuqaa maqusaki ititasee misa narusee faiqí moomoo karabusa rumbasee misa ainaina faqa indaa mamaree nifiqamaree meerai narí maqusai oorureenoo narí maqannaasa qimannimifaqa mina amooqiafanoo ainaina raina niminau.

⁹ Mi tamummaqara fasiqana ufa kooroo irafa Yisunara maaqimminoo maridanoo. ¹⁰ Mifa narí maqusai meerai ooru funara maaqi qidanoo, mifa naaree meemai maqa ameemaanai ooqureenoo miqooqari mifa kai innaaruna maarini aiqama innaaruna maarinni oorureenoo narí marirana narí auqu amana kai marianifeera aiqama atinai narí irirana narí auqu amana kai quqasanau.

¹¹ Mifa kaqi nimira dadaaqira afeeka faiqí anaasee niminau, mi dadaaqira afeekafa ainainirana akoofasaikiaqee qimasee akaqausee niqiqoo fasiqausa akoofasaikirana niminau, akaqausa faiqí anaasee qimannimirana akoofasaikirana niminau, akaqausa aamina maqannaasa qimannirana akoofasaikirana faqa paatoo saika akoofasaikirana faqa ufasaa rakisirana akoofasaikirana faqa niminau.

¹² Anutufa sia fifaufau mi dadaaqira afeekana niminau, faiqí anaasee Yisuna ufara suqimariasaa Yisuna afaaqara foora afeekaikamasee mariaqeera mi dadaaqira afeekana oosana oosana maasa qiminoo qinau, innee maa dadaaqira afeekana marasee minannai qini ufara suqimariasaa afeekaikamannisaqee

qinau. ¹³ Maasa miqimamaree fidaqa maasa kasooqaqee moodaanaki kianauro. Anutuna amaakuara irirana faqaa irirana minasaa rusirana faqa miqiananannai mi moodaanaki kirafa amana kambiqaannoo, mikari maasa faiqí firaasa iriranara foora maraanauranoo maraseeqa asauku mundirana firaa irirana amana kai ooru mundufuanauranoo. ¹⁴ Mikari maasa sia faiqí aanaaqiara foora aiqama oosana oosana amaana ufa iriseeqa munari minari ianaura unna ufa qimaria fasiqausa nári nikaruqira finnai akaqausa aqaranaki rarisama quqaidaqa maasa misa ufa iriseeqa sia ufaira foora aiqama saqari udammi udammianauro. ¹⁵ Maasa sia miqiaqa, maaqiaqa, nariara nariara qimudao qimasee ridaqa minaki maridaqa nariara nariara sia unnufa qiaqa, anoona ufa kai qidaqa maasa miqianannai faiqí aanaaqiara foora asauku mundirana maasa qikiaqa amanakai innooqamaree ooru mundufuanauro.

¹⁶ Asauku mundirafa narí ufa ameemaanai mariasa rakisimarifaqa misa minara maasa qikiaqa fee qidaqa. Faiqí afaaqa sia moodaa ainaina maridanoo oosana oosana afaaqa ati fannoo aadu aadu ainaina akoofasaikirana moodaanaki ootupamafifanoo moodaa fasiqa maridanoo. Asauku mundirafa maasa qikiaqa marifa maasa rakisimarifaqa maasa faqa miqi kai iqa faiqí afaaqa fooqaana aadu aadu akoofasaikirausa moodaanaki ootupanoo marifaqa maasa qikiaqa Yisunasaa atooqa maridaqa mina afaaqaikiqa maridaqa. Maasaki aiqamausa naadu naadu nariqa saikirana

andeeqasee maridaqa sia nariara nariara
nikooqaani nariara nariara rinnanannai
moodaanaki innooqafinoo amiqimmandee
kambiqafi fuannoo.

*Asauku mundiranaki mariasa asukunakinaa
oosana taikafinoo kaaqa qarafa aniani.*

¹⁷ Miqi marianara qinee Pauroosa Karaam-
baiqa auqusaa inni qimannimidaqa afeekaika-
mandee kafaa kafaa qimannimidaqa, sia Anutu-
nara aamina maqannaasa naanna raaqa. Misa
irirafa fifau faafaumminoo maridanoo. Innee
andeeqasee mariaqa. ¹⁸ Misa nitikurakinaa iri-
rafa asukunaki maridanoo Anutufa nimimari
marirana sia misa kaqikaaqoo maraidaqa aanaa-
muruara foora sia maraidaqa, misa kaaqa iri-
rana siaisa furufari mariasa nári qimaqaamau
kai fimariasa, minara kai asukunaki maridaqa.
¹⁹ Misa nisaurirana taikaransa maridaqa nári
nifaaqa marirana mandoosanai kai ubeekaidaga
oosana oosana nisaurimaria ainainna sia nisauri-
daqa fanandidaga kaqi umaraidaga.

²⁰⁻²¹ Innee Efeesusa maqannaasa miqira man-
doosana sia asauku mundirana saaqaraana iri-
afanoo, innee minara irisee Yisuna aiku asauku
kambiqafufaqa andeeqara irirana faqaasa inni
mina anoona ufa inni qimannimiafaqa irimari-
afanoo. ²² Minara innee inneeqa ooqeenaa
marirana nirana fatika agusaaqa inni ooqeenaa
marirafa inniqa mareeqeenoo inniqa manda
nikaruqira nidiranaki quqasoofaqa miqoo in-
nee inneeqa kai kuridimariafanoo. ²³ Inni

nimuqusaki manda nidira nidimarina faqa nitikura mandirira irimariana faqa taikasee innaarunaindaraana fuka amiqirafa kai mariani. ²⁴ Inni innaarunaindaraa fuka marirafa Anutuna narí miqirafa maridanoo, mina anoona ufaki andeeqasee marirana faqa Anutuna ufa ameemaanai marirana faqa mina amooqirana faqa mi fuka marirafa anoona maridanoo, innee mi marirana kai qamunnara foora afisusee minaki maraqa nuaqa.

²⁵ Doo minara maaqooqari sia unna ufa kafaa mariani, taikaani, aiqama narinni narinni anoona ufa kai narí qimami narí qimami qi-aqa, maasa aiqamausa moodaa nifaaqara foora kai marunnnara naríndi naríndi marunnnara unna ufa sia qiaqa anoona ufa kai qiaqa.

²⁶⁻²⁷ Ani aanooirafa kambiqafinoo sia anirarisameeqee mandainainaki quqaani, anee aanoo qinana doo mi faasaanasaa mi suanina keeqarana namufaqa taikaseena faiqaa sia kisaagasaa aanoida maria, dauni taikaa, Sadannafa minaki keekafinoo mandainaina uqeeraandoora.

²⁸ Ainaina ummuari mari fasiqafa ummuarirana taikaani, taikasee quandaki andeeqasee narí ainainamasee narí narana namasee kudi fasiqauqa faqa naida niminaqa naaqa.

²⁹ Sia putaa ainaina afunda ainainara ufa qiaqa, faiqí anaasee pooduqamannimaqaida dadaaqimaria ufana kai qimasaiqaqaa misa iriseeqa amiqirana adiafaairana mareefaranoo.

³⁰ Manda ufa qinanoo Anutuna naaquqara maraqa fannoo iriseenoo akooqaanoo. Anu-

tuna maraquna fannoo inni faqa marifa Anutuna akarara foora naríndi fee qidanoo inniki akara ri-noo maridanoo. Mi maraquna akarafa maaqi qimasee inniara qima afeekaikidanoo kasoogaqee Anutufa qinanoo Yisufa qumuree inniara qinindi fee qimasee maraannoo.

³¹ Doo maqee aukwana aiqama sukaqara ufa faqa qusufa qimasee darara qirafa faqa naunduraki mari aanooirafa faqa fatika aquaqa. Nariara nariara firaa kari nameera ufasaa niqimari-afa faqa aquraree mariannana faqa sia kafaa mariani naundurakinaa nariara nariara fidiqaa ira irirafa faqa taikaani.

³² Sia miqiaqa, maaqiaqa, nariara nariara ireeda kai nimuqusa reendeenirafa faqa dadaaqirafa faqa mariani, narinni narinni mandainaina minnisaaqa. Maasa oosana oosana ainainannai Anutuna mandaikamma amaqaafanausa marifanoo Anutufa asauku mundiranannai maasa darirana minniqisanau. Doo innee minara iriseeqa mina amana kai doo inniqa niqoonausa mandaikamma nimaqarana narí minnisee narí minnisee iaqa.

5

Anutufa maasara rirana ammeemmeriaqa kaaqa qarana maraaqa.

¹⁻² Innee Efeesusa maqusanaasara Anutuna amuqusira aiku asauku marianara mina ammeemmeriaqa asauku mundirafa maasara ri-noo amuqusinoo narí marirana maasa qimaaqa

maqasee kuqiranaki quqasoofanoo tatufira aandau sugara fara foora Anutuna aikiambu inau, innee faqa miqi kai iqa asauku mundirafa maasara rirana ameemmeerida nariara nariara ruaqa. Inni nariara nariara rirafa maqee maqee inniqa marirana rakisinnimaqaani.

³ Innee Anutuna maqasaa aiku asauku marianara inniki faiqi anaasee nari ummuari nari ummuari maria ufana faqa ikairi irirana faqa ainainara faqa aanaaseera faqa kaaqa fanandi mariana faqa sia mi oosanna maraaqa minara ufa qimariafa faqa doo taikaqa. ⁴ Ikairi putaa ufa faqa furufarira ufa faqa uteeti qimasee naanaindara qimaria ufana faqa aiqama sia andeeqara ufa sia inniki amanaikinoo maridanoo Anutuna maqasaa aiku asauku mariafanoo. Innee sia miqaa miqaa iaqa, maaqiqa innee maqee maqee Anutunara dufi dufi qirafa kai inniki mariani. ⁵ Innee maa moodaa ainainara kai amiqimmandee iriaqa, faiqi anaasee nari ummuari nari ummuari mariasa faqa ikairi faqaasa faqa kaaqa ainainara rimariasa faqa miqaa qiqa nuasauqa, asauku mundirana ququsaki faqa Anutuna ququsaki faqa sia uqanna kaqikaqoo mareefaranoo. Kaaqa ainainara rimaria oosanafa mifa moo unna anutunara innaaru qimaria fara foora mina ufa iri maria fara foora maridanoo.

⁶ Minara moo fannoo mi oosana oosana manda ainainnara aufadamasee ufa qimasee nari furufarira ufannai inni nikaruqimasee mandainainaki fuaqee qinaqa sia uqanna innee mina iriaqa. ⁷ Maqee maqee Anutufa mi manda

oosannara kai qaoo qimarifaqa sia irianannai kai Anutuna aanoo qirafa misasaa aqufidanoo. Minara qinee inni qimannimidaqa miqinna fasiqa anaaseesa sia misa faqa mariaqa, nianasaa rufiasee mariaqa. Minara qinee maaqi qimasee qimannimidaqa.

⁸ Ooqai innee Efeesusa maqusanaasa faqa asukunaki mariusa mariafanoo doo maqee karaambaiqa Anutuna faiqi anaasee aiku asuku kamambi mariafanoo kaaqa qarana fooqaasa mariafanoo, doo minara iriseeqa kaaqa qaranaki mariasara foora ida mariaqa. ⁹ Kaaqa qarafa qafuqakinaa ainaina amiqi amiqifanoo kambiqaidanoo Anutuna kaaqa qaranaki mariasa miqi kai iqa kaaqa qaranaki maridaqa misaki amiqirana faqa andeeqarana faqa anoona ufa qirana faqa misaki kambiqaidanoo. ¹⁰ Innee karaambaiqa aidi mari mariranara randasee maraaqa. ¹² Asukunaki mariasa kukeeqaranaki maridaqa oosana oosana manda nisauri maria ainainna maraifaqa maasa misara qisauruanoo qimasee sia misa oosanara kaqikaagoo ufa qianaara. ¹¹ Minara innee furufarira marirana maree mariasara faqa asukunakinaa oosana maree mariasara faqa rufiasee innee nianasaa mariaqa innee misa manda asukuna mareeqee aiqamausa nifusaa kaaqa qara qoo quqasaifaqa mi manda asukunaki mariasa nisaurirana marasee minnisaaqeera. ¹³ Mi manda ainainausa mareeqee aiqamausa nifusaa kaaqa qara qoo quqasaifanoo mi manda ainainausa oosana uqanna kaaqa kooroomambuannoo. ¹⁴ Aiqama ainaina asukunakinaana mareeqe kaaqa qara

qoo aiqamausa nifusaa quqasaifanoo mi ainainausa faqa kaaga qaranaikiannoo. Minara maasa idi moo maaqi qinoo maridanoo.

Anee faiqee marianafa findi fua.

Kuqiranakiqari findi finanoo

asauku mundirafa suaniara foora anisaa qaani.

¹⁵ Mi ufafa miqinoo marinara innee Eefeesusa maqannaasa inneeqa mariranasaa amiqimmandee rakisiaqa. Sia aamina fasiqara foora mariaqa irirana faqaasara foora mariaqa.

¹⁶ Maa kamuqoo manda marira kamu marinara sia fifau suani afu afeesimarina kaqinni aiqaraani, aiqama faasaanara ainainira faasaanee qiaqa.

¹⁷ Minara innee sia furufariaqa Karaambaiqa inniara fuaqee qinaqa fifandinnanara faqa auqee fandinnanara faqa ooqai iridanoo innee mi iriranara randasee paqurimandee mi mau afeekaikamandee fidaqa qafaaqa.

¹⁸ Innee nammari namasee furufarirana sia maraaqa mifa inni kuridimarifa maridanoo Anutuna maraquina fannoo kai inni naakufinoo naundurairi qumbiqafinaqa mariaqa.

¹⁹ Innee narí qimami narí qimamidaqa Anutunara amooqirafa inni naundurairi qumbiqafina maridaqa Dafidina idi faqa amaana idi faqa Anutunara rara idi faqa mi idinannai narí qimami narí qimami qiaqa.

²⁰ Maasa karaambaiqa asauku mundirana Yisuna auqusaa maqee maqee aiqama ainainara maasa qikoona Anutunara dufi dufi qiaqa.

Faiqí aanaaseera qidanoo.

²¹ Innee asauku mundiranara naaquqee mari-nara nariara nariara ureeqafi maridaqa reen-deena mandee mariaqa.

²² Innee aanaaseeuqa faiqí ninaaqmaaka qimannimidaqa, innee faqa karaambaiqa aramandunnai maridaqara foora inneeqa nifaaqmaaka ufa ameemaanai miqimandee mariaqa.

²³ Asauku mundirafa narí ufara suqimariasa innaaruna asumu nimimarifa maridanoo, misa uriqararafa maridanoo, anaasee nifaaqmaaka miqikai iqa nári ninaaqmaaka uriqara mafi marianara inneeqa nifaaqmaaka nimeemaanai ureeqaqa mariaqa. ²⁴ Asauku mundirana ufara suqimariasa eedoo qimasee mina aramandunnai ooqu mari fidaqa mariandee kai iqa aanaaseeuqa nári nifaaqmaaka aiqama ufa ameemaanai mariaqa.

²⁵ Faiqí inni faqa qimannimidaqa innee aanaaseeuqa nifaaqmaaka inni qimannimidaqa, innee faqa asauku mundirana aanna raaqa, Yisufa narí ufara suqimariasa narí aanaaqara foora misara kaaqa amuqusufanoo misa naaru mariaqeera qimasee narí marirana misara kuqiranaki paasoosamandee quqanau. Innee inneeqa ninaaqmakara miqi kai iqa uriqarara ainainee qimasee nimuqusinaqa ruaqa. ²⁶⁻²⁷ Fuka anaasee narí afaaqinnai fuanee qimaseenoo afaqa anukamaseenoo amiqira siara qamunna afisumareenoo narí afaqa akumbau fee namuana fee qikairi fee sia marifanoo andeeqa mareenoo narí afaaqinnai fidanoo. Asauku mundirafa narí ufara suqimariasa fuka anaaseera foora nammariara

foora ruma nimaqaseenoo andeeqara
 amiqiranaki faqa nifaaqa idaaqiranaki
 faqa mareeqeenoo narinnai amiqiranaki
 quqaani fee qimaseenoo maasa narí ufannai
 nammariara foora ruma qimaqasaidanoo
 nariara kai mara quqeenoo, minara Yisufa
 narí ufara suqimariasara amuqusufanoo narí
 marirana misara kuqiranaki quqanau maqi
 qidaqa. ²⁸ Faiqí nári ninaaqmaakara miqi kai
 mandee nári nifaaqara foora nimuqusiani,
 narí aanaaqara uriqarara ainainee qimasee
 amuqusimariafa narí kai nariara faqa uriqarara
 ainainee qidanoo amuqusidanoo. ²⁹⁻³⁰ Sia
 moo fannoo narí afaaqara akooqaidanoo
 amiqimmandee rakisidanoo narana amidanoo
 asauku mundirafa Yisufa narí ufa suqimariasara
 narí afaaqafee qimaseenoo rakisidanoo, innee
 faqa miqikai iqa inneeqa ninaaqmaakara qini
 qifaaqa fee qimasee amiqimasee rakisiaqa.
³¹ Ooqeenaa tamummaqara fasiqauqa akara
 mina maaqimminoo maridanoo,

Anutufa qunara faiqí moo fannoo narí anoofa
 akoona minniseenoo narí aanaaqasaa
 atooqafinoo miqanda moodaa kara
 mafifaranoo.

³² Mi ufana maa ainainnara kikiqusidanoo
 anoona amiqirafa maridanoo asauku mundi-
 rafa faqa narí ufara suqimariasaa faqa faiqí narí
 aanaaqara faqara foora inoo maridanoo moodaa
 kara mafuannoo. ³³ Mi ufana inni faiqiara
 faqa qidanoo aiqama fasiqa nári ninaaqmaakara
 nári nifaaqara foora nári nimuqusiani, anaasee

faqa nári nifaaqmaaka ufa ameemaanai eedoo qimasee mariaqa.

6

Faiqiuqaindiara faqa nári ninaukoora faqa qidanoo.

¹ Faiqiuqaindi inniara qidaqa, inneeqa ninausa nikausa ufara eedoo kai qiaqa. Innee Yisuna ufara suqimariasaki marianara andeeqarafa mifa maridanoo. ² Mooseena sandufara innee irimariafanoo minakinaafa aaquqira ufa qisaukuqara taikasee maridanoo. Minakinaana moo sandufa maasa mi mau fuanoo Anutufa moo ainaina maaqoo maa maqanasaa maasa qimirara qima afeekaikammaqoofa maaqimminoo maridanoo, inniqa ninausa nikausara naaquqaina misa ufamau fuaqa. ³ Fifanoo Anutufa inniara kisaagasaa inneeqa maqa maaqaki mariadaqa amiqiranaki mariaqee qimasee maasara qimafeekaikinau. Maasa mi ufanara uriqarara ufee qidaqa. Doo innee faiqiuaindi mi mau fuaqa.

⁴ Faiqi nikausamara inni qimannimidaqa sia inneeqa faiqi fifau nirana fundakifaqa aanoo iaqa, sia miqiaqa, maaqiaqa, Yisuna ufamau inni faiqiuqa andeeqee andeeqasaifaqa Yisuna ufasaa innooqaqa.

Ainainimariasara faqa misa uriqararawsa faqa misara qidanoo.

⁵ Qinee Pauroosa innee moosa ainainimariasaa qimannimidaqa. Inneeqa feefauru marara saikaki keeqafinaqa amiqimasee mina

ainainammaisaaqa. Sia nifaaqa quqasee mana mana iaqa. Innee naaquqee marinaqa ainaina akoona anainammaisaaqa, innee asauku mundirana ainainidee qidaqa maqasaa ainaina akoona amiqimasee nimuqusannai ainainammaisaaqa. ⁶ Sia misa eedoo qira ufara kai irisee misa nifusaa kai ainainiaqa, inneeqa nimuqusannai Anutuna ufamau asauku mundirana ainainidara foora amiqimasee ainainamannimaqaqa. ⁷ Sia fifau faiqi ainainamaiseera fooriaqa, karaambaiqa ainainammidee qimasee amiqimasee ainainamaisaa. ⁸ Innee miqidaqa maanara iriaqa, Karaambaiqa aiqama fasiqa amana amana kai nimidanoo moosa rumbara saikaki mariasee nari ainainira saikaki mariasee nari amiqira ainainirana akiaqara amana amana kai innaarunai nimiannoo.

⁹ Qinee ainainimariasara innee inneeqa ainaina akoona amiqimasee ainainammaisaa qee qimaseeqa innee ainaina akausa faqa qimannimidaqa innee faqa miqikai mandee inniqa ainainimariasasaa amiqimmandee rakisiaqa, amiqimasee ainainiaqee qimasee aanoo irana faqa narirari mariana faqa taikaaqa. Innee faqa maanara iriaqa, innee faqa inni ainainimariasaa faqa moodaa rakisirafa innaarunai marifa, sia mifa ainainimariasara ureeqarausee qimasee kafaa quandaki rakisi nimaqee mariasara uriqararausee qimasee qaara irirana maraidanoo, moodaa irirana marasee amana amana kai rakisi nimaqaidanoo.

Roomma maqannaa sundiara foora afaaqa ititamareena Sadannana faqa rakuuqa.

¹⁰ Maa ufana taikara ufa maaqimminoo maridanoo, innee karaambaiqa faqa maridaqa moodaanaki nimarifaqa mina firaa afeekannai inni faqa moodaanakikirana firaaqoo afeekaikamma mapukuaqa. ¹¹ Sadannafa oosana oosana nari manda nikaru qiranannai inni naruannoo, innee minara rufiasee Anutufa niminna saqari duru saamunannai inneeqa nifaaqa ititaaqa. ¹² Maasa Yisuna ufa irimariasa sia faiqi faqa rakidaqa maasa meerai Anutuna innaaruna ameemaanai maria manda afaanausa faqa rakidaqa, maa asukunaki maria kamuqoo mirindari rakimariasa faqa misa uriqararusa faqa misa faiqi firaasa faqa meeraindari maasa daruafaqa maasa misa faqa rakidaqa. ¹³ Innee minara iriseeqa Anutufa niminna duru saamu saqarina qumareeqa deedaqida mariaqa. Sadannafa mi manda faasaanna narirara anirainaga innee amanaikiqa mariafanoo nari faqa aruafaqaammasee miqoo kai eeraaramasee ititaga mariaqa, sia amana ainnaaqaraani.

¹⁴ Minara qimannimidaqa. Innee findifi deedaqida mariaqa Sadannafa inni mandoosana nimisee naruandoora. Roomma maqannaa sundia nifaaqa rafaafimariana kikiqususee inniara qianauroo. Inneeqa fausanda niraanaqumuki rumbee maria fara foora mifa inni anoona ufa kai qirafa mifa mariannoo. Inni nimuqusasaa ititee maria afeeka ainainara foora inni andeeqara oosana mariannoo. ¹⁵ Inni niku ititee mariafa niku aanaamuara foora mifa Anut-

ufa faqa mari asoora amiqira fasaasa ufa maqee maqee aamina maqannaa qimannimirafa mifa inni niku aanaamuara foora ititarafa mariannoo. Mi andeeqara oosannausa marasaifanoo Sadannafa sia amana inni naruani.

¹⁶ Inniqa saqari ukeeqirira fara foora Yisuna saqarikirafa maridanoo. Innee Roomma maqannaa sundiara foora maqee maqee mi saqarina ukeeqirisee maraqa nifanoo Sadannafa nari feefa ida muquru qumaree inniara oosana oosana furufarira irirana minannai inni nifaqa naqusee nariraree qimasee aqusainaqa innee Yisuna saqarikiranannai mina mafi ruki aquaqa.

¹⁷ Roomma maqannaa sundiauqa rakiranaki fidaqa qafee nikiaqa afisusee nikiaqa rukamifoora afisimariqau. Inneeqa nikiaqaki ititee maria qafeenara foora Anutufa innaarunai asumu marirana nimufa maridanoo. Sadannafa inni kuridiranaki maqee maqee mara quqararinaga innee mi qafeena afisusee asumu mariaqa. Roomma maqannaa sundiauqa rakira paipana dinni dinni afafaqaanannai faiqi ateekeeqa raquru nimiqa imariqau. Inni raiqara paipana aseema fooqaafa marina Anutuna ufa maridanoo mina maraqa fannoo mi ufana nimu ufafa maridanoo. Sadannafa inni faqa rakiqa mi samuna qumaree mina aruqa.

¹⁸ Innee mi ainainausa maraidaqa innaaru qidaqa maqee maqee Anutuna dadaaqiranara faqa innaaru qiaqa. Anutuna maraqa afeekannai maqee maqee eendaki faqa faasaana faqa Anutuna maqasaa fasiqa anaaseera Anutufa amiqi amiqimma nimaqaanifeera innaaruqiaqa.

Sia kudoosaapaaga afeekaikamandee innaaruqiaga. ¹⁹ Qini Pauroosara faqa innaaru qiaga Anutufa oosana qimasainaqa qinee faiqi anaasee Yisunara qimannimianauree qimasee paasoosamandee qimannimianauree, Yisuna amiqira fasaasa ufa ooqai kukeeqanoo marifa maqee aukwana Anutufa faiqi anaasee kooroomannimaqeenoo.

²⁰ Qinee Pauroosa mi amiqira fasaasa ufana aanaiqikirausa maridaqa. Kuqaa Roomma maqanna karabusaki maridaqa kuqaa aanaiqikirausa maridaqa. Anutufa qiniara paasoosamandee faiqi anaasee qimannimianne qifaqa innee qiniara innaaru qifaqa paasoosamandee qimannimianauree.

Pauroona akara taikara akara.

²¹ Qinee Tikikusana aqiqaananoo qini daufakiana inni qimannimiannoo. Mifa maasa qimuqusi mari qikaqaafasaafa maridanoo, karaambaiqa saikaki amiqi amiqira ainainimarifa maridanoo. Mifa qini fasaasa ufa inni qimanniminaqa innee qini mariranara iriaqeera. ²² Mina qimannimianifeera aqiqaanaura inni nimuqusa pooduqaanifeera aqiqaanauranoo. ²³ Maasa qikoofa Anutufa faqa maasa karaambaiqa asauku mundirana Yisuna faqa naunduraki asoarana faqa nariara nariara uriqarara ainainee qimasee nimuqusirana faqa Yisuna saqarikirana faqa inni aiqama qini qikaqaafasaauqa nimiani. ²⁴ Innee aiqamausa maasa karaambaiqa asauku mundirana Yisunara

sia taikee maria rirana rimariasa, Anutuna
afaarirafa inni faqa mariani.

Fúka Moodaanaki Kira Ufa Afaqínaasa Ufa
Portions of the Holy Bible in the Binumarien
language of Papua New Guinea
Buk Baibel long tokples Binumarien long Niugini

copyright © 1983, 2001, 2017 Wycliffe Bible Translators, Inc.

Language: Binumarien

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-10

PDF generated using Haiola and XeLaTeX on 21 Feb 2024 from source files dated 31 Aug 2023

4a891130-f25d-5e30-a81c-882b2e037698